

摘藻堂四庫全書薈要

子部

欽定四庫全書薈要

子部

御製律呂正義後編卷八十八



詳校官主事臣陳本

欽定四庫全書舊要卷一萬一千二十四

子部

御製律呂正義後編卷八十八

樂制考十一

宋四



宋

紹興中太常卿蘇檣言將來明堂行禮除登歌大樂已備見闕樂舞諸路州軍先有頒降登歌大樂乞行搜訪應用丞周執羔言大樂兼用文武二舞今殿前司將下任道係前大晟府二舞色長深知舞儀宜令赴寺教習卿陳桷言前期五使例合按閱仍詔應侍祠執事朝臣並作樂教習禮儀博士周林復言神位席地陳設至尊親行酌獻堂上下皆地坐作樂而鐘

磬工乃設木小榻當教習日使立以考擊庶革循習簡陋之弊

初上居諒闇臣僚有請罷明堂行禮奏樂受胙等事上諭禮官詳定太常寺檢照景德熙豐親郊典故除郊廟景靈宮並合用樂其鹵簿鼓吹及樓前宮架諸軍音樂皆備而不作每處警塲止鳴金鉦鼓角而已即無去奏樂受胙之文大饗為民祈福為上帝宗廟而作樂禮不敢以卑廢尊書敕五福錫庶民况熙寧

禮尤可考其赦文有曰六樂備舞祥祉來臻是也於是詔遵行之其後禮部侍郎施垌奏禮經蕃樂出於荒政蓋一時以示貶抑昨內外暫止用樂今徽考大事既畢慈寧又已就養其時節上壽理宜舉樂一如舊制禮部尋言太母還宮國家大慶四方來賀自今冬至元正舉行朝賀之禮依國朝故事合設大仗及用樂舞等庶幾明天子之尊舊典不至廢墜有詔俟來年舉行

十有三年郊祀有司言大禮排設備樂宮架樂辦一
料外登歌樂依在京夏祭例合用兩料其樂器登歌
則用編鐘磬各一架祝敔二搏拊鼓二琴五色自一
二三五七至九絃各二瑟四篴四塤篴簫並二巢笙
和笙各四并七星九曜閏餘匏笙各一麾幡一宮架
則用編鐘編磬各十二架祝敔二琴五色各十瑟二
十六巢笙及簫並一十四七星九曜閏餘匏笙各一
等笙十塤一十二篴一十八篴二十晉鼓一建鼓四

麾幡一乃從太常下之兩浙江南福建州郡又下之
廣東西荆湖南北括取舊管大樂上於行都有闕則
下軍器所製造增修雅飾而樂器寔備矣其樂工照
依太常寺所請選擇行止畏謹之人合登歌宮架凡
用四百四十人同日分詣太社太稷九宮貴神其樂
工舞師照在京例分三等廩給其樂正掌事掌器自
六月一日教習引舞色長文武舞頭舞師及諸樂工
等自八月一日教習於是樂工漸集

十四年太常寺言將來大禮見闕玉磬十六枚其所定聲律係於玉分厚薄取聲高下正聲凡十有二黃鐘厚八分進而為大呂太簇夾鐘姑洗仲呂蕤賓林鐘夷則南呂無射應鐘每律增一分至應鐘一寸九分而止清聲夾鐘厚二寸三分退而為太簇大呂黃鐘共四清聲各減一分至黃鐘二寸而止乃下之四川茶馬司寬數增分市易以供用太常博士張晟又言大樂所用武舞之飾以干配刀周禮司兵祭祀授

舞者兵先儒謂授以朱干玉戚郊特牲朱干玉戚冕
而舞大武乃從所請倣三禮圖令造玉戚以配舞干
是歲始上徽宗徽號特製顯安之樂至於奉皇太后
冊寶於慈寧宮樂用聖安皇后受冊寶於穆清殿樂
用坤安亦皆先後參次而舉顯安以無射夾鐘為宮
周大司樂饗先王奏無射而歌夾鐘夾鐘之六五上
生無射之上九夾鐘卯之氣二月建焉而辰在降婁
無射戌之氣九月建焉而辰在大火無射陽律之終

夾鐘實為之合蓋取其相親合而萃祖考之精神於假廟也聖安純用大呂坤安純用中呂大呂陰陽之首宗母儀也中呂陰律之次明婦順也

明年正旦朝會始陳樂舞公卿奉觴獻壽据元豐朝會樂第一爵登歌奏和安之曲堂上之樂隨歌而發第二爵笙入乃奏瑞曲惟吹笙而餘樂不作第三爵奏瑞曲堂上歌堂下笙一歌一吹相間第四爵合樂仍奏瑞曲而上下之樂交作今悉倣舊典首奏和安

次奏嘉禾成文滄海澄清瑞粟呈祥三曲其樂專以太簇為宮太簇之律生氣湊達萬物於三統為人正於四時為孟春故元會用之

凡雅樂皆以安名南郊樂其宮圜鐘明堂樂其宮夾鐘圜鐘即夾鐘也夾鐘生於房心之氣實為天帝之堂故為天宮祭地祇其宮函鐘即林鐘也林鐘生於未之氣未為坤位而天社地神實在東井輿鬼之外故為地宮饗宗廟其宮用黃鐘黃鐘生於虛危之氣

虛危為宗廟故為人宮此三者各用其聲類求之然
天宮取律之相次圜鐘為陰聲第五陰將極而陽生
故取黃鐘為角黃鐘陽聲之首也太簇陽聲之第二
故太簇為徵姑洗陽聲之第三故姑洗為羽天道有
自然之秩序乃取其相次者以為聲地宮取律之相
生函鐘上生太簇故太簇為角太簇下生南呂南呂
上生姑洗故南呂為徵姑洗為羽地道資生而不窮
乃取其相生者以為聲人宮取律之相合黃鐘子大

呂丑故黃鐘為宮大呂為角子合丑也太簇寅應鐘
亥故太簇為徵應鐘為羽寅合亥也人道以合而相
親乃取其合者以為聲周之降天神出地元禮人鬼
樂之綱要實在於此獨商聲置而不用蓋商聲剛而
主殺實鬼神之所畏也樂奏六成者即倣周之六變
八成九成亦如之文武二舞皆用八佾國初始改崇
德之舞曰文德改象成之舞曰武功其發祥流慶降
真觀德則祥符所製以薦獻聖祖其佑文化俗威功

睿德則皇祐所製以奉明禋其祀帝有司行事以帝
臨嘉至神娛錫美與夫獻太廟以孝熙昭德禮洽諸
祥則製於元豐其廣生儲佑厚載凝福以祀方澤則
製於宣和至紹興祀皇地祇易以儲靈錫慶嚴恭將
事而用宣和所製舞以分祀神州地祇轉相緝熙樂
舞寢備至中興而賡續裁定實集其成中祀而下多
有樂而無舞則在禮凡小祭祀不興舞之義也
紹興三十一年有詔教坊日下蠲罷各令自便

隆興元年天申節率羣臣詣德壽宮上壽議者以欽宗服除當舉樂事下禮曹黃中復奏曰臣事君猶子事父也春秋賊未討不書葬以明臣子之責況欽宗實未葬而可遽作樂乎事遂寢

乾道改元始郊見天地禮官奏議壇下宮架二百七人省十之一琴二十人瑟十二人各省其半笙簫遂可省者十有八人箎塤可省者十人其分詣給祠凡一百十四止用八十人鐘磬凡四十八架止設三十

有二人其宮架鐘磬仍舊排殿閒慢樂色量省人數
悉報如章

禮部郎官蕭國梁又言議禮者嘗援紹興指揮時事
亞獻既入太室即引終獻行事雖便於有司侍祠免
至跛倚而其流將至於簡宗廟用之郊饗尤為非宜
蓋有獻必有樂卒爵而後樂闋今亞終獻樂舞雖同
而其作有始其成有終不可亂也若使之相繼行事
雜然於酌獻之間則其為樂舞者不知亞獻之樂耶

終獻之樂耶詔從其請訂定

淳熙六年始舉明堂裡禮命五使按雅樂并嚴更警
場於貢院奉詔將樂器依堂上堂下儀制排設五使
及應赴官僚從旁立觀按閱仍聽往來察視時大禮
使趙雄言前例閱樂至皇帝詣飲福位一曲即五使
以下皆立而每閱奠玉幣及酌獻等樂皆坐自如於
禮未盡不當襲用前例故有是詔

按是年御製明堂樂章玉海云淳熙六年四月禮

官奏下學士院修製明堂樂章七月周必大言紹

興樂章多因學士汪藻所撰略加增損臣竊見皇

祐二年文彥博等言明堂大饗天地祖宗樂章乞

從御製仁宗親作四曲用之嘉祐七年又製明堂

迎神送神樂章政和七年八月十二日徽宗製明

堂樂曲九章紹興二十八年七月二十四日製南郊并

前二日朝獻景靈宮前一日朝饗太廟共十三章惟

明堂樂章未經御製欲望特行宸藻親製天地祖

宗四位酌獻樂章二十七曲從之

禮官討論自紹興以來凡五饗明堂禮畢還輦並未
經用樂即無作樂節次可考乃參酌禮例成禮稱賀
及肆赦用樂尊駕並用皇祐大饗典故施行其南郊
明堂儀注實述紹興成憲又命有司兼酌元豐大觀
舊典為後世法程其用樂作止之節燦然可觀前三
日太常設登歌樂於壇上稍南北向設宮架於壇南
內壝之外立舞表於鄼綴之間

明堂登歌設於堂上
前楹間宮架設於庭

中前一日設協律郎位二一於壇上樂廬西北一於

宮架西北押樂官二太常丞於登歌樂廬北太常卿

於宮架北省牲之夕押樂太常卿及丞入行樂架協

律郎展視樂器祀之日樂正帥工人二舞以次入皇

帝乘輿自青城齋殿出樂正撞景鐘降輿入大次景

鐘止

明堂不用景鐘

服大裘袞冕自正門入協律郎跪俯伏

舉麾興工鼓祝宮架乾安之樂作凡升降行止皆奏

之

明堂奏儀安

至午階版位西向立協律郎偃麾戛敔樂

止明堂至作階下樂止凡樂皆協律郎舉麾而後作偃麾而後

止禮儀使奏請行事宮架作景安之樂明堂作誠安文舞

進左丞相等升詣神位前樂作六成止皇帝執大圭

再拜內侍進御匱悅宮架樂作悅手畢樂止禮儀使

前導升壇宮架樂作至壇下樂止升自午階明堂並升自階

階登歌樂作至壇上樂止登歌嘉安之樂作明堂至堂上作

鎮安奠鎮圭奠玉幣於上帝樂止詣皇地祇太祖太宗

神位前如上儀禮儀使導還版位登歌樂作降階樂

止

明堂降
自昨階

宮架樂作至版位樂止奉俎官入正門宮

架豐安之樂作

明堂作
僖安

跪奠俎訖樂止內侍以御匱

帨進宮架樂作帨手拭爵樂止禮儀使導升壇宮架

樂作至午階樂止升自午階登歌樂作至壇上樂止

明堂無
升壇

登歌僖安之樂作

明堂作
慶安

詣神位前三祭酒

少立樂止讀冊皇帝再拜每詣神位並如之禮儀使

導還版位登歌樂作降階樂止宮架樂作至版位樂

止奏請還小次宮架樂作入小次樂止武舞進宮架

正安之樂作

明堂作穆安

舞者立定樂止亞獻升詣酌尊

所西向立宮架正安之樂作

明堂皇太子為亞獻作穆安

三祭酒

以次酌獻如上儀樂止終獻亦如之奏請詣飲福位

宮架樂作至午階樂止升自午階登歌樂作將至位

樂止登歌僖安之樂作

明堂作昨安

飲福禮畢樂止禮儀

使導還版位登歌樂作降階樂止宮架樂作至版位

樂止

明堂不降階

徹豆登歌熙安之樂作

明堂作散安

送神宮

架景安之樂作一成止

明堂作誠安

詣望燎望瘞位宮架

樂作至位樂止

明堂有燎無瘞

燎瘞畢還大次宮架乾安之

樂作

明堂作憇安

至大次樂止皇帝乘大輦出大次樂正

撞景鐘

明堂不用景鐘

鼓吹振作降輦還齋殿景鐘止百官

宗室班賀於端誠殿奏請聖駕進發軍樂導引至麗

正門大樂正令奏采茨之樂入門樂止

明堂就賀於紫宸殿不奏

采茨乃御麗正門肆赦前期太常設宮架樂于門之前

設鉦鼓於其西皇帝升門至御閣大樂正令撞黃鐘

之鐘右五鐘皆應乾安之樂作升御坐樂止金鷄立

太常擊鼓囚集鼓聲止宣制畢大樂正令撞蕤賓之

鐘左五鐘皆應皇帝還御幄樂止乘輦降門作樂導

引至文德殿降輦樂止按大禮用樂凡三十有四色

歌色一遠色二塤色三箎色四笙色五簫色六編鐘

七編磬八搏鐘九特磬十琴十一瑟十二祝敔十三

搏拊十四晉鼓十五建鼓十六鞀應鼓十七雷鼓祀天

神用十八雷鼗鼓同上一十九靈鼓祭地祇用二十靈鼗鼓同上

二十一路鼓饗宗廟用二十二路鼗鼓同上二十三雅鼓二

十四相鼓二十五單鼗鼓二十六旌纛二十七金鉦
二十八金鐃二十九單鐸三十雙鐸三十一鐃鐸三
十二奏坐三十三麾幡三十四此國樂之用尤大者
故具載於篇

初紹興崇建皇儲詔有司備禮冊命然在欽宗恤制
未及制樂乾道初元詔立皇太子命禮部太常寺討
論舊禮以聞受冊日陳黃麾仗於大慶殿設宮架樂
於殿庭皇帝升御坐作乾安之樂升用黃鐘宮降用

黻賓宮皇太子入殿門作明安之樂受冊出殿門亦如之皆用應鐘宮至七年易應鐘而奏以姑洗建隆定樂雖詔皇太子出入奏良安至道始冊皇太子有司言太子受冊宜奏正安之樂百年曠典至是舉行中外胥悅至天禧冊命禮儀院復奏改正安之樂乾道之用明安實祖述天禧而以姑洗為宮則唐東宮軒垂奏樂舊貫云

皇帝御大慶殿行冊禮皇太子服遠游冠朱明衣執

桓圭前期習儀禮官及有司並先一日入宿衛展宮
架樂設太子次冊寶幄次百官次又設皇太子受冊
位典寶褥位應行禮等皆有位列黃麾半仗於殿門
內外質明百官就次皇太子常服詣幕次持寶卽陳
八寶於御位之左右有司奉冊寶至幄次百官朝服
入班殿庭有司自幄次奉冊寶至褥位參知政事中
書令導從官各就位侍中升殿俟宣制皇太子易服
執圭俟於殿門外樂正撞黃鐘之鐘乾安之樂作皇

帝即御坐殿上侍臣起居樂止行禮官贊引皇太子入就殿庭東宮官從初入殿門明安之樂作樂止皇太子起居次百官起居各拜舞如儀皇太子詣受冊位侍中前承旨降階宣制皇太子拜舞如儀侍中升殿復位中書令詣讀冊位捧冊官奉冊至中書令跪讀畢興皇太子再拜有司奉冊至皇太子位中書令跪以冊授皇太子皇太子跪受以授右庶子置於案次侍中以寶授皇太子皇太子跪受以授左庶子如

上儀皇太子再拜中書舍人押冊中允押寶以出次
皇太子出如來儀初行樂作出殿門樂止次百官稱
賀樂正撞蕤賓之鐘乾安之樂作皇帝降坐樂止放
仗在位官再拜以出

孝宗素恭儉每賀正使赴宴作樂多遇上辛齋禁有
司條治平用樂典故以進及生辰使上壽適親郊散
齋樞密副使陳俊卿請以禮諭北使毋用樂不得已
則上壽之日設樂而宣旨罷之及宴使人然後用之

庶存事天之誠上可其奏且曰宴殿雖進御酒亦勿
用宰相葉顥魏杞方主用樂之議以為樂奏於紫宸
乃使客之禮俊卿獨奏曰彼初未嘗必欲用樂而我
乃望風希意自為失禮以徇之他日輕侮何所不至
尋詔垂拱上壽止樂正殿猶為北使擢用後三年賀
使當朝辭復值散齋上乃諭館伴以決意去樂及議
所以處之者如使人必以作樂為言則移茶酒就驛
管領遂有更不用樂之詔

按建炎以來朝野雜記云故事北使來朝例錫花宴如在大祀齋之中則不用樂辭見亦然行之久矣乾道三年金使來朝會慶節上壽在親郊散齋之內陳正獻公時以副樞兼參預請令館伴以禮諭之而議者慮生事多請權用樂者李文簡為吏部郎官建言漢唐祀天地散齋四日致齋三日我藝祖初郊亦然自崇寧大觀法周禮分祭天地故前十日受誓戒今既合祭宜復漢唐及本朝舊制

庶幾兩得上頗難之陳公又奏必不得已則上壽
之日設樂而宣旨罷之及宴使客然後復用庶幾
事天之誠得以自盡而所以禮使人者亦不為薄
自當悅服矣上可其奏且曰宴殿雖進御酒亦毋
用樂唯於使人乃用之耳諸公顧以為紫宸上壽
乃使客之禮固執前議陳公又不可獨奏言曰適
奉詔旨有以見聖學高明過古帝王遠甚臣敢不
奉詔然猶竊謂更當先令館伴以初議諭使人再

三不從乃從今詔則於禮為盡而彼亦無詞不可
遽鄙夷人而遂自為失禮以徇之也蔣子禮猶守
前說陳公爭愈力上顧陳公曰可即諭閣門行之
陳公退復為奏曰彼初未嘗必欲用樂我乃望風
希意而自欲用之彼必笑我以敵國之臣而虧事
天之禮他時輕侮何所不至此尤不可不留聖慮
上嘉納焉既而卒詔垂拱上壽止樂正殿為北使
權用六年生辰使當辭復在親郊散齋之內趙溫

叔丞相時以起居舍人為館伴使面奏決不可用
樂上然之十月癸酉北使辭先一日上遣中使諭
溫叔云來日已決意不用樂萬一使人不順不知
如何結末請舍人更加思慮來日五更奏來溫叔
復奏殿陛之上匆匆行酒使人決不能省會萬一
省會亦必不敢不順萬一不順臣忝備員館伴當
乞直前奏稟乞宣諭使人陛下寅畏上天今既散
齋決不使樂若使人必欲使樂乞移此茶酒就驛

中管領所謂結末不過如此上納用焉金使之來
極恭順上思以異禮待之故葉魏二相皆主用樂
之議鄭景望劉文潛時為館職嘗移書政府論之
不聽至用趙公之議始去樂論者題之

其後因雨澤愆期分禱天地宗廟精修雩祀按禮大
雩帝用盛樂而唐開元祈雨雩壇謂之特祀乃不以
樂薦於是太常朱時敏言通典載雩禮用舞童歌雲
漢晉蔡謨議謂雲漢之詩興於宣王歌之者取其修

德禳災以和陰陽之義乞用舞童六十四人衣玄衣歌雲漢之詩詔亟從之

淳熙二年詔以上皇加上尊號立春日行慶壽禮有司尋言乾道加尊號用宮架三十六樂工共一百一十三人今來加號慶壽事體尤重合依大禮例用四十八架樂正樂工用一百八十八人庶得禮樂明備仍令分就太常寺貢院前五日教習前期太常設宮架之樂於大慶殿協律郎位於宮架之北東向押樂

太常卿位於宮架之北北向皇太子及文武百僚並
位於宮架之北東西相向又設宮架於德壽殿門外
協律郎太常卿位如之及發冊寶日儀仗鼓吹列於
大慶殿門樂正帥工人以次入贊者引押樂太常卿
協律郎入就位奏中嚴外辦訖禮儀使奏請皇帝恭
行發冊寶之禮太常卿導寶冊正安之樂作中書令
奉寶侍中奉冊進行禮安之樂作發寶冊畢鼓吹振
作儀衛等以次從行皇帝自祥曦殿輦至德壽宮行

禮冊寶入殿門作正安之樂上皇出宮作乾安之樂
升御座奉上冊寶作聖安之樂降御坐作乾安之樂
太后冊寶進行用正安出閣升坐用坤安降坐入閣
復作坤安之樂禮部尚書趙雄等言國朝舊制車駕
出奏樂請慶壽行禮日聖駕往還並用樂及簪花詔
從之既而太常又言郊禋禮成宜進胙慈闈行上壽
飲酒禮所有上壽合辦仙樓仍用樂其樂人照天申
節禮例凡上詣德壽宮或恭請上皇游幸或至南內

或上皇命同宴游或時序賞適過宮侍宴或聖節張樂珥花奉玉卮為上皇壽率從容竟日隆養至樂備極情文

孝宗大享明堂起居舍人鄭僑奏昔舜居堯喪三載過密後世既用漢文以日易月之文又用漢儒越紼行事之制循習既久不特用禮而又用樂去古愈遠聖主躬服通喪有司請舉大禮屈意從之且大饗之禮祭天地也聖主身親行之行禮作樂似不可廢其

他官分獻與夫先期奏告例用樂者權宜蠲寢今若因明堂損益而裁定之亦足為將來法乃命太常討論始詔除降神奠玉幣奉俎酌獻換舞徹豆送神依典禮作樂外所有皇帝及獻官盥洗登降等樂皆備而不作云

光宗行中宮冊禮發冊於文德殿皇帝升降御坐用乾安之樂皇后出就褥位用坤安至位用承安受冊實用成安受內外命婦賀就坐用和安內命婦進行

賀禮用惠安外命婦進行賀禮用咸安皇后降坐用
徽安歸閣用太安冊寶入殿門用宜安宋初立后自
景祐始行冊命之禮元祐納后典章彌盛而六禮發
制書日樂備不作惟皇后入宣德門朝臣班迎鳴鐘
鼓而已崇寧中乃陳宮架用女工皇后升降行止並
以樂為節至紹興復製樂以重禕翟詔執色勿用女
工令太常止於門外設樂隆興冊禮時則國樂未舉
淳熙始遵用之而紹熙敷賁舊典於此特加詳備紹

興樂奏仲呂宮仲呂為陰紹熙樂奏太簇宮太簇為陽用樂同而揆律異焉

郊祀太常耿秉奏今所用雷鼓之屬正所以祀天致神而皮革虛緩聲不能振應登歌大樂樂器及樂舞工人冠服有積歲久而損弊者宜葺新之太常在籍樂工不給於役召募百姓罕能習熟郊祀事重其樂工親扈乘輿和樂雅奏期以接天地享祖宗請優其日廩以籍田司錢給之樂藝稍精仍加賞勸其緣託

權要送名充數者嚴戢絕之又言大禮前期皇帝朝饗太廟別廟內安穆安恭皇后二室前此係大臣分詣行事今既親詣室裸其酌獻升殿所奏樂曲恐不相協宜命有司更製皆從之

寧宗初臣僚言皇帝因重明聖節詣壽康宮上壽舉樂檢照典故天申節賜御筵在上壽次日今乃於前一日賜文武百僚宴重明上壽用樂攸始而臣下聽樂乃在君父之先義有未安遂命改用次日凡奉上

冊寶於慈福壽康宮者再備樂行禮一用乾道舊制
尋御文德殿制冊皇后有司請設宮架之樂依議施
行

十四年詔山東河北連城慕義殊俗效順奉玉寶來
獻其文曰皇帝恭膺天命之寶寶惟我祖宗之舊及
明年元日上御大慶殿受寶用鼓吹導引備陳宮架
大樂奏詩三章一曰恭膺天命二曰舊疆來歸三曰
永清四海並奏以太簇宮

理宗享國四十餘年凡禮樂之事式遵舊章未嘗有
所改作先是孝宗廟用太倫之樂光宗廟用太和之
樂至是寧宗祔廟用大安之樂紹定三年行中宮冊
禮並用紹熙元年之典及奉上壽明仁福慈睿皇太
后冊寶始新製樂曲行事

中興六七十載之間士多歎樂典之久墜類欲蒐講
古制以補遺軼姜夔乃進大樂議於朝夔言紹興大
樂多用大晟所造有編鐘鐃鐘景鐘有特磬玉磬編

磬三鐘三磬未必相應埙有大小簫簴遂有長短笙
竽之簧有厚薄未必能合度琴瑟絃有緩急燥濕軫
有旋復柱有進退未必能合調總衆音而言之金欲
應石石欲應絲絲欲應竹竹欲應匏匏欲應土而四
金之音又欲應黃鐘不知其果應否樂曲知以七律
為一調而未知度曲之義知以一律配一字而未知
永言之旨黃鐘奏而聲或林鐘林鐘奏而聲或太簇
七音之協四聲各有自然之理今以平入配重濁以

上去配輕清奏之多不諧協八音之中琴瑟尤難琴
必每調而改絃瑟必每調而退柱上下相生其理至
妙知之者鮮又琴瑟聲微常見蔽於鐘磬鼓簫之聲
匏竹土聲長而金石常不能以相待往往考擊失宜
消息未盡至於歌詩則一句而鐘四擊一字而竽一
吹未協古人槁木貫珠之義况樂工苟焉占籍擊鐘
磬者不知聲吹匏竹者不知穴操琴瑟者不知絃同
奏則動手不均迭奏則發聲不屬比年人事不和天

時多忒由大樂未有以格神人召和氣也宮為君為
父商為臣為子宮商和則君臣父子和徵為火羽為
水南方火之位北方水之宅常使水聲衰火聲盛則
可坐南而抑北宮為夫徵為婦商雖父宮實徵之子
常以婦助夫子助母而後聲成文徵盛則宮唱而有
和商盛則徵有子而生生不窮休祥不召而自至災
害不祓而自消聖主方將講禮郊見願詔求知音之
士考正太常之器取所用樂曲條理五音櫟括四聲

而使協和然後品擇樂工其上者教以金石絲竹匏
土詩歌之事其次者教以憂擊干羽四金之事其下
不可教者汰之雖古樂未易遽復而追還祖宗盛典
實在茲舉其議雅俗樂高下不一宜正權衡度量自
尺律之法亡於漢魏而十五等尺雜出於隋唐正律
之外有所謂倍四之器銀字中管之號今大樂外有
所謂下宮調下宮調又有中管倍五者有曰羌笛孤
笛曰雙韻十四絃以意裁聲不合正律繁數悲哀棄

其本根失之太清有曰夏笛鷓鴣曰胡盧琴渤海琴
沉滯抑鬱腔調含糊失之太濁故聞其聲者性情蕩
於內手足亂於外禮所謂漫易以犯節流湏以忘本
廣則容姦狹則思欲者也家自為權衡鄉自為尺度
乃至於此謂宜在上明示以好惡凡作樂製器者一
以太常所用及文思所頒為準其他私為高下多寡
者悉禁之則斯民順帝之則而風俗可正其議古樂
止用十二宮周六樂奏六律歌六呂惟十二宮也王

大食三侑注云朔日月半隨月用律亦十二宮也十二管各備五聲合六十聲五聲成一調故十二調古人於十二宮又特重黃鐘一宮而已齊景公作徵招角招之樂師涓師曠有清商清角清徵之操漢魏以來燕樂或用之雅樂未聞有以商角徵羽為調者惟迎氣有五引而已隋書云梁陳雅樂並用宮聲是也若鄭譯之八十四調出於蘇祇婆之琵琶大食小食般涉者胡語伊州石州甘州婆羅門者胡曲綠腰誕

黃龍新水調者華聲而用胡樂之節奏惟瀛府獻仙音謂之法曲即唐之法部也凡有催袞者皆胡曲耳法曲無是也且其名八十四調者其實則有黃鐘太簇夾鐘仲呂林鐘夷則無射七律之宮商羽而已於其中又闕太簇之商羽焉國朝大樂諸曲多襲唐舊竊謂以十二宮為雅樂周制可舉以八十四調為宴樂胡部不可雜郊廟用樂咸當以宮為曲其間皇帝升降盥洗之類用黃鐘者羣臣以太簇易之此周人

王用王夏公用鷺夏之義也其議登歌當與奏樂相合周官歌奏取陰陽相合之義歌者登歌徹歌是也奏者金奏下管是也奏六律主乎陽歌六呂主乎陰聲不同而德相合也自唐以來始失之故趙慎言云祭祀有下奏太簇上歌黃鐘俱是陽律既違禮經抑乖會合今太常樂曲奏夾鐘者奏陽歌陰其合宜歌無射乃或歌大呂奏函鐘者奏陰歌陽其合宜歌蕤賓乃或歌應鐘奏黃鐘者奏陽歌陰其合宜歌大呂

乃雜歌夷則夾鐘仲呂無射矣苟欲合天人之和此
所當改其議祀享惟登歌徹豆當歌詩古之樂或奏
以金或吹以管或吹以笙不必皆歌詩周有九夏鐘
師以鐘鼓奏之此所謂奏以金也大祭祀登歌既畢
下管象武管者簫篪箏之屬象武皆詩而吹其聲此
所謂吹以管者也周六笙詩自南陔皆有聲而無其
詩笙師掌之以供祀饗此所謂吹以笙者也周升歌
清廟徹而歌雍詩一大祀惟兩歌詩漢初此制未改

迎神曰嘉至皇帝入曰永至皆有聲無詩至晉始失
古制既登歌有詩夕牲有詩饗神有詩迎神送神又
有詩隋唐至今詩歌愈富樂無虛作謂宜倣周制除
登歌徹歌外繁文當刪以合乎古其議作鼓吹曲以
歌祖宗功德古者祖宗有功德必有詩歌七月之陳
王業是也歌於軍中周之愷樂愷歌是也漢有短簫
鐃歌之曲凡二十二篇軍中謂之騎吹其曲曰戰城
南聖人出之類是也魏因其聲製為克官渡等曲十

有二篇晉亦製為征遼東等曲二十篇唐柳宗元亦
嘗作為饒歌十有二篇述高祖太宗功烈我朝太祖
太宗平僭偽一區宇真宗一戎衣而却契丹仁宗海
涵春育德如堯舜高宗再造大功上儷祖宗願詔文
學之臣追述功業之盛作為歌詩使知樂者協以音
律領之太常以播於天下夔乃自作聖宋饒歌曲宋
受命曰上帝命平上黨曰河之表定維揚曰淮海清
取湖南曰沅之上得荊州曰皇威暢取蜀曰蜀土遂

取廣南曰時雨霈下江南曰望鍾山吳越獻國曰大
哉仁漳泉獻土曰謳歌歸克河東曰伐功繼征澶淵
曰帝臨墉美仁治曰維四葉歌中興曰炎精復凡十
有四篇上於尚書省書奏詔付太常然夔言為樂必
定黃鐘迄無成說其議今之樂極為詳明而終謂古
樂難復則於樂律之原有未及講

宋之樂議因時迭出其樂律高下不齊俱有原委建
隆初用王朴樂藝祖一聽嫌其太高近於哀思詔和

峴考西京表尺令下一律比舊樂始和暢至景祐皇祐間訪樂議樂之詔屢頒於是命李照改定雅樂比朴下三律照以縱黍累尺雖律應古樂而所造樂器才中太簇樂與器自相矛盾阮逸胡瑗復定議止下一律以尺生律而黃鐘律短所奏樂聲復高元豐中以楊傑條樂之疵召范鎮劉几參定几傑所奏下舊樂三律范鎮以為聲雜鄭衛且律有四釐六毫之差太簇為黃鐘宮商易位欲求真黍以正尺律造樂來

獻復下李照一律至元祐廷奏而詔獎之初鎮以房
庶所得漢書其言黍律異於他本以太府尺為黃帝
時尺司馬光力辨其不然鎮以周黼漢斛為據光謂
黼本考工所記斛本劉歆所作非經不足法鎮以所
收開元中笛及方響合於仲呂校太常樂下五律教
坊樂下三律光謂此特開元之仲呂未必合於后夔
力止鎮勿奏所為樂光與鎮平生大節不謀而同惟
鐘律之論往返爭議凡三十餘年終不能以相一是

時濂洛關輔諸儒繼起遠派聖傳義理精究周惇頤
之言樂有曰古者聖王制禮法修教化三綱正九疇
叙百姓大和萬物咸若乃作樂以宣八風之氣樂聲
淡而不傷和不而淫淡則欲心平和則躁心釋德盛
治至道配天地古之極也後世禮法不修刑政苛紊
代變新聲導欲增悲故有輕生敗倫不可禁者矣樂
者古以平心今以助欲古以宣化今以長怨不復古
禮不變今樂而欲至治者遠哉程頤有曰律者自然

之數先王之樂必須律以考其聲尺度權衡之正皆起於律律管定尺以天地之氣為準非秬黍之比也律取黃鐘黃鐘之聲本不難定有知音者參上下聲考之自得其正張載有曰聲音之道與天地通蠶吐絲而商弦絕木氣盛則金氣衰乃此理自相應今人求古樂太深始以古樂為不可知律呂有可求之理惟德性深厚者能知之三子之學可謂窮本知變達樂之要者矣朱熹與蔡元定蓋深講於其學者而研

覃真積述為律呂新書

按廣治平略云周子程子張子之餘論皆論其理
或未究其要南渡後建陽蔡元定作鐘律書成其
所論多近代之未講而皆不離古人之成法先求
聲氣之元而必因律以生尺蓋卓然獨得而為朱
子之所深取也考朱子鐘律蕤賓重上生者月律
也與月令同蔡氏新書蕤賓下生大呂則樂均也
與史記同而黃鐘以下生者倍始於丑三分二而

三之則得林鐘之實凡律生呂皆如之林鐘以上
生者四始於寅九分八而三之則得太簇之實凡
呂生律皆如之此雖朱蔡之所未及也橫渠以喉
齒牙舌唇調宮商角徵羽轉聲而不變字為善歌
若證諸黃帝五鐘宮與角徵常顯諸仁而商羽則
藏諸用歌奏合則羽比於角徵流於商以反為文
則歸其宮焉是知仁禮義統於聖一如臣民事物
從其君矣此又橫渠之所未及也明道以八十四

聲分清濁取中聲而上下之若證諸韶本六府五
事宮羽之中聲為清角商羽之中聲為流徵移宮
換羽角必返宮以水和土以土和火以火化金以
金治木木復返土五行合和以正德厚生利用故
能降天神出地祇格人鬼而九成焉是天地四時
人之七始皆自中聲往返又明道之所未及者也
元定先究律呂本原分其篇目又從而證辨之其黃
鐘篇曰天地之數始於一終於十其一三五七九為

陽九者陽之成也其二四六八十為陰十者陰之成也黃鐘者陽聲之始陽氣之動也故其數九分寸之數具於聲氣之先不可得而見及斷竹為管吹之而聲和候之而氣應而後數始形焉均其長得九寸審其圍得九分積其實得八百一十分長九寸圍九分積八百一十分是為律本度量權衡於是而受法十

一律由是損益焉

其證辨曰古者考聲候氣皆以聲之清濁氣之先後求黃鐘也夫律

長則聲濁而氣先至律短則聲清而氣後至極長極短則不成聲而氣不應今欲求聲氣之中而莫適為

準莫若且多截竹以擬黃鐘之管或極其短或極其長長短之內每差一分而為一管皆即以其長權為九寸而度圍徑如黃鐘之法焉更迭以吹則中聲可得淺深以列則中氣可驗苟聲和氣應則黃鐘之為黃鐘者信矣黃鐘信則十一律與度量權衡者得矣後世不知出此而惟尺之求晉氏而下多求之金石梁隋以來又參之柷黍至王朴專恃累黍金石亦不復考夫金石真偽固難盡信而柷黍長短小大不同尤不可恃古人謂子穀柷黍中者實其倫是先得黃鐘而後度之以黍以見周徑之度以生度量權衡之數而已非律生於黍也百世之下欲求百世之前之律者亦求之聲氣之元而毋必之於柷黍斯得之矣

黃鐘生十一律篇曰子寅辰午申戌六陽辰皆下生丑卯巳未酉亥六陰辰皆上生陽數以倍者三分本

律而損其一也陰數以四者三分半律而增其一也
六陽辰當位自得六陰位以居其衝其林鐘南呂應
鐘三呂在陰無所增損其大呂夾鐘仲呂三呂在陽
則用倍數方與十二月之氣相應蓋陰陽自然之理
也其證辨曰按呂氏淮南子上下生與司馬氏律書
漢書志不同雖大呂夾鐘仲呂用倍數則一然呂
氏淮南不過以數之多寡為生之上下
律呂陰陽錯亂而無倫非其本法也十二律篇曰

按十二律之實約以寸法則黃鐘林鐘太簇得全寸
約以分法則南呂姑洗得全分約以釐法則應鐘蕤

賓得全釐約以毫法則大呂夷則得全毫約以絲法

則夾鐘無射得全絲約至仲呂之實十三萬一千七

十二以三分之不盡二算其數不行此律之所以止

於十二也

其證辨曰黃鐘為十二律之首他律無大於黃鐘者其正聲不為他律役至於大呂

之變宮夾鐘之羽仲呂之徵蕤賓之變徵夷則之角無射之商自用變律半聲非復黃鐘此其所以最尊而為君之象然非人所能為乃數之自然他律雖役之而不可得也此一節最為律呂旋宮用聲之綱領

也變律篇曰十二律各自為宮以生五聲二變其黃

鐘林鐘太簇南呂姑洗應鐘六律則能具足至蕤賓

大呂夷則夾鐘無射仲呂六律則取黃鐘林鐘太簇南呂姑洗應鐘六律之聲少下不和故有變律律之當變者有六黃鐘林鐘太簇南呂姑洗應鐘變律者其聲近正律而少高於正律然後洪纖高下不相奪

倫變律非正律故不為宮

其證辨曰十二律循環相生而世俗不知三分損益

之數往而不返仲呂再生黃鐘止得八寸七分有奇不成黃鐘正聲京房覺其如此故仲呂再生別名執始轉生四十八律不知變律之數止於六者出於自然不可復加雖強加之亦無所用也房之所傳出於焦氏焦氏卦氣之學亦去四而為六十故其推律必求合此數不知數之自然在律不可增於卦不可減

也何承天劉焯譏房之病乃欲增林鍾已下十一律
之分使至仲呂反生黃鍾還得十七萬七千一百四
十之數則是惟黃鍾一律成律他十一律
皆不應三分損益之數其失又甚於房 律生五聲

篇曰宮聲八十一商聲七十二角聲六十四徵聲五
十四羽聲四十八按黃鍾之數九九八十一是為五
聲之原三分損一以下生徵徵三分益一以上生商
商三分損一以下生羽羽三分益一以上生角至角
聲之類六十四以三分之不盡一算數不可行此聲

之數所以止於五也

其證辨曰通典曰黃鍾為均用
五聲之法以下十一辰辰各有

五聲其為宮商之法亦如之辰各有五聲合為六十聲是十二律之正聲也夫黃鍾一均之數而十一律於此取法焉以十二律之宮長短不同而其臣民事物尊卑莫不有序而不相亂良以是耳沈括不知此理乃以為五十四在黃鍾為徵在夾鍾為角在仲呂為商者其亦誤矣俗樂之有清聲畧知此意但不知仲呂反生黃鍾黃鍾又次林鍾再生太簇皆為變律已非黃鍾太簇之清聲耳胡瑗於四清聲皆小其圓徑則黃鍾太簇二聲雖合而大呂夾鍾二聲又非半律之半且自夷則至應鍾四律皆以次而小其徑圓以就之遂使十二律五聲皆有不得其正者李照范鎮止用十二律則又未知此理蓋樂之和者在於三分損益樂之辨者在於上下相生若李照范鎮之法其合於三分損益者則和矣自夷則已降其臣民事物豈能尊卑有辨而不相凌犯乎晉荀勗之笛梁武帝之通皆不知而作者也

變聲篇曰變

宮聲四十二變徵聲五十六五聲宮與商商與角徵與羽相去各一律至角與徵羽與宮相去乃二律相去一律則音節和相去二律則音節遠故角徵之間近徵收一聲比徵少下故謂之變徵羽宮之間近宮收一聲少高於宮故謂之變宮角聲之實六十有四以三分之不盡一算既不可行當有以通之聲之變者二故執一而兩三之得九以九因角聲之實六十有四得五百七十六三分損益再生變徵變宮二聲

以九歸之以從五聲之數存其餘數以為彊弱至變

徵之數五百一十二以三分之又不可盡二算其數又

不行此變聲所以止於二也變宮變徵宮不成宮徵

不成徵淮南子謂之和謬所以濟五聲之不及也變

聲非正聲故不為調

其證辨曰宮羽之間有變宮角徵之間有變徵此亦出於自然

左氏所謂七音前漢志所謂七始是也然五聲者正聲故以起調畢曲為諸聲之綱至二變聲則不比於

正音但可濟其所不及而已然有五聲而無二變亦不可以成樂也

八十四聲篇曰黃

鐘不為他律役所用七聲皆正律無空積忽微自林

鐘而下則有半聲大呂太簇一半聲夾鐘姑洗二半聲蕤賓林鐘四半聲夷則南呂五半聲無射應鐘為六半聲中呂為十二律之窮三變聲也自蕤賓而下則有變律蕤賓一變律大呂二變律夷則三變律夾鐘四變律無射五變律仲呂六變律也皆有空積忽微不得其正故黃鐘獨為聲氣之元雖十二律八十四聲皆黃鐘所生然黃鐘一均所謂純粹中之純粹者也八十四聲正律六十三變律二十一六十三者

九七之數也二十一者三七之數也六十調篇曰十二律旋相為宮各有七聲合八十四聲宮聲十二商聲十二角聲十二徵聲十二羽聲十二凡六十聲為六十調其變宮十二在羽聲之後宮聲之前變徵十二在角聲之後徵聲之前宮徵皆不成凡二十四聲不可為調黃鐘宮至夾鐘羽並用黃鐘起調黃鐘畢曲大呂宮至姑洗羽並用大呂起調大呂畢曲太簇宮至仲呂羽並用太簇起調太簇畢曲夾鐘宮至蕤

賓羽並用夾鐘起調夾鐘畢曲姑洗宮至林鐘羽並
用姑洗起調姑洗畢曲仲呂宮至夷則羽並用仲呂
起調仲呂畢曲蕤賓宮至南呂羽並用蕤賓起調蕤
賓畢曲林鐘宮至無射羽並用林鐘起調林鐘畢曲
夷則宮至應鐘羽並用夷則起調夷則畢曲南呂宮
至黃鐘羽並用南呂起調南呂畢曲無射宮至大呂
羽並用無射起調無射畢曲應鐘宮至太簇羽並用
應鐘起調應鐘畢曲是為六十調六十調即十二律

也十二律即一黃鐘也黃鐘生十二律十二律生五聲二變五聲各有紀綱以成六十調六十調皆黃鐘損益之變也宮商角三十六調老陽也其徵羽二十四調老陰也調成而陰陽備也或曰日辰之數由天五地六錯綜而生律呂之數由黃鐘九寸損益而生二者不同至數之成則日有六甲辰有五子為六十日律呂有六律五聲為六十調若合符節何也曰即所謂調成而陰陽備也夫理必有對待數之自然也

以天五地六合陰與陽言之則六甲五子究於六十其三十六為陽二十四為陰以黃鐘九寸紀陽不紀

陰言之則六律五聲究於六十亦三十六為陽二十

四為陰蓋一陽之中又自有陰陽也非知天地之化

育者不能與於此

其證辨曰禮運五聲六律十二管還相為宮孔氏疏曰黃鐘為第一

宮至中呂為第十二宮各有五聲凡六十聲聲者所以起調畢曲為諸聲之綱領此禮運所謂還相為宮也周禮大司樂祭祀不用商惟宮角徵羽四聲古人變宮變徵不為調左氏傳曰中聲以降五降之後不容彈矣以二變聲之不可為調也後世以變宮變徵參而為八十四調其亦不考矣候氣篇曰

以十二律分配節氣按歷而俟之其氣之升分毫絲忽隨節各異夫陽生於復陰生於姤如環無端今律呂之數三分損益終不復始何也曰陽之升始於子午雖陰生而陽之升於上者未已至亥而後窮上反下陰之升始於午子雖陽生而陰升於上亦未已至巳而後窮上反下律於陰則不書故終不復始也是以升陽之數自子至巳差彊在律為尤彊在呂為差弱自午至亥漸弱在律為尤弱在呂為差彊分數多

寡雖若不齊然而絲分毫別各有條理此氣之所以
飛灰聲之所以中律也或曰易以道陰陽而律不書
陰何也曰亦盡天下之變善惡無不備律主中和之
用止於至善者也以聲音之大而至於雷霆細而至
於蟻螻無非聲也易則無不備也律則寫其所謂黃
鐘一聲而已雖有十二律六十調然實一黃鐘也是
理也在聲為中聲在氣為中氣在人則喜怒哀樂未
發與發而中節此聖人所以一天人贊化育之道也

其證辨曰律者陽氣之動陽聲之始必聲和氣應然後可以見天地之心今不此之務乃區區於秬黍之縱橫古律之大小其亦難矣然非精於歷數則氣節亦未易正至於審度量謹權衡會萃古今辨析尤詳皆所以參伍而定黃鐘為中聲之符驗也

按藝文志云蔡元定律呂新書二卷蔡元定傳元定於書無所不讀於事無所不究義理洞見大原下至圖書禮樂制度無不精妙所著有律呂新書朱熹深好其書謂國家行且平定中原必將審音

協律以諧神人受詔典領之臣宜得此書奏之以

備東都郊廟之樂燾定鐘律詩樂樂制樂舞等篇
彙分於所修禮書中皆聚古樂之根源簡約可觀
而鐘律分前後篇其前篇為條凡七一曰十二律
陰陽辰位相生次第之圖二曰十二律寸分釐毫
絲忽之數三曰五聲五行之象清濁高下之次四
曰五聲相生損益高下之次五曰變宮變徵二變
相生之法六曰十二律正變倍半之法七曰旋宮

八十四聲六十調之圖其後篇為條凡六一曰明
五聲之義二曰明十二律之義三曰律寸舊法四
曰律寸新法五曰黃鍾分寸數法六曰黃鍾生十
一律數大槩率采元定所著更互演繹尤為明邃
其樂制彙於王朝禮其樂舞彙於祭禮上下千載
旁搜遠紹昭示前聖禮樂之非迂而將期古樂之
復見於今熹蓋深致意焉其詩樂篇別系於後
按文獻通考朱晦庵儀禮經傳通解鐘律篇曰十

二律陰陽辰位相生次第之圖曰十二律分寸釐毫絲數曰五聲五行之象清濁高下之次曰五聲相生損益之先後之次曰二變相生之法曰十二律正變倍半之法曰旋宮八十四聲之圖曰六十

調之圖

六十調即前旋宮圖內六十聲也

曰明五聲之義曰明十

二律之義曰律寸舊法

本周禮鄭玄注及杜佑通典法推之定為此數曰

律寸新法

本太史公律書生鐘分寸蔡元定以寸分釐毫絲忽約之得此法


曰黃鐘

寸分數法

蔡元定云云

曰黃鐘生十一律數

御製律呂正義後編卷八十八



總校官庶吉士臣張能照

校對官中書臣馮培

謄錄監生臣楊搢

欽定四庫全書薈要

子部

御製律呂正義後編卷八十九



詳校官主事臣陳木

欽定四庫全書薈要卷一萬一千二十五

子部

御製律呂正義後編卷八十九

樂制考十二

宋五



宋

江左有鼓吹樂唐大駕法駕小駕及一品而下皆有
馬宋初因之車駕前後部用金鉦節鼓撾鼓大鼓小
鼓鐃鼓羽葆鼓中鳴大橫吹小橫吹觱篥桃皮觱篥
簫笳笛歌導引一曲又皇太子及一品至三品皆有
本品鼓吹凡大駕用一千五百三十人為五引司徒
六十四人開封牧太常卿御史大夫兵部尚書各二
十三人法駕三分減一用七百六十一人為引開封

牧御史大夫各六十六人小駕用八百一十六人太常鼓吹署樂工數少每大禮皆取之於諸軍一品已下喪葬則給之亦取於諸軍又大禮車駕宿齋所止夜設警場角一千二百七十五人奏嚴用金鉦大角大鼓樂用大小橫吹威篳篥簫笳笛角手取於近畿諸州樂工亦取於軍中或追府縣樂工備數歌六州十二時每更三奏之凡祀前一日上御青城門觀奏嚴若車駕巡幸則夜奏於行宮前人數減於大禮凡用

八百八十人

真宗崇奉聖祖亦設儀衛別作導引曲今附之

兩朝志云大駕

千七百九十三人法駕千三百五人小駕千三十四

人

人數多於前

鑾駕九百三十五人迎奉祖宗御容或神

主祔廟用小鑾駕三百二十五人上宗廟謚冊二百人其曲卽隨時更製

自天聖已來帝郊祀躬耕藉田皇太后恭謝宗廟悉用正宮導引六州十二時凡四曲景祐二年郊祀減導引第二曲增奉裡歌初李照等撰警嚴曲請以振

容為名帝以其義無取故更曰奉禋其後祫享太廟亦用之大享明堂用黃鐘宮增合宮歌凡山陵導引靈駕章獻章懿皇后用正平調仁宗用黃鐘羽增昭陵歌神主還宮用大石調增虞神歌凡迎奉宗祖御容赴宮觀寺院并神主祔廟悉用正宮唯仁宗御容赴京靈宮改用道調皆止一曲

按文獻通考云本朝鼓吹止有四曲十二時導引降仙臺并六州為四又鼓吹四曲悉用教坊新聲

車駕出入奏導引及降仙臺警嚴奏六州十二時
皆隨月用宮又仁宗既定雅樂并及鼓吹且謂警
嚴一奏不應再用其曲親製奉裡歌以備三疊又
詔聶冠卿李照造詞以配聲下本局歌之是年郊
祀遂用焉皇祐親饗明堂御製合宮歌熙寧親郊
導引還青城增降仙臺曲

熙寧中親祀南郊曲五奏正宮導引奉裡降仙臺祠
明堂曲四奏黃鐘宮導引合宮歌皆以六州十二時

永厚陵導引警場及神主還宮皆四曲虞主祔廟奉
安慈聖光獻皇后山陵亦如之諸后告遷升祔上仁
宗英宗徽號迎太一宮神像亦以一曲導引率因事
隨時定所屬宮調以律和之

元豐中言者以鼓吹害雅樂欲調治之令與正聲相
得楊傑言正樂者先王之德音所以感召和氣格降
上神移變風俗而鼓吹者軍旅之樂耳蓋鼓角橫吹
起於西域聖人存四夷之樂所以一天下也存軍旅

之樂示不忘武備也鞀鞀氏掌夷樂與其聲歌祭祀
則歛而歌之燕亦如之今大祀車駕所在則鼓吹與
武嚴之樂陳於門而更奏之以備警嚴大朝會則鼓
吹列於宮架之外其器既異先代之器而施設概與
正樂不同國初以來奏大樂則鼓吹備而不作同名
為樂而用實異雖其音聲間有符合而宮調稱謂不
可淆混故大樂以十二律呂名之鼓吹之樂則曰正

宮之類而已

乾德中設鼓吹十二案制璫床十二為
熊羆騰倚之狀每案設大鼓羽葆鼓金

鍾各一歌簫笳各一又有叉手笛名曰拱宸管
考驗皆與雅音相應列於宮縣之籍編之令式 若以

律呂變夷部宮調則名混同而樂相紊亂矣遂不復
行

元符三年七月學士院奏太常寺鼓吹局應奉大行
皇帝山陵鹵簿鼓吹儀仗并嚴更警場歌詞樂章依
例撰成靈駕發引至陵所仙呂調導引等九首已令
樂工協比聲律從之

政和七年三月議禮局言古者饒歌鼓吹曲各異其

名以紀功烈令所設鼓吹唯備警衛而已未有饒歌之曲非所以彰休德揚偉績也乞詔儒臣討論撰述因事命名審協聲律播之鼓吹俾工師習之凡王師大獻則令鼓吹具奏以聳羣聽從之

十二月詔六州改名崇明祀十二時改名稱吉禮導引改名熙事備成六引內者設而不作

紹興十六年臣僚言國家大饗乘輿齋宿必設警塲肅儀衛而嚴祀事樂工隸太常歌詞備三疊累朝以

來皆用之比者郊廟行事率代以鉦鼓取諸殿司夫
軍旅祭祀事既異宜樂聲清濁用以殊尚鉦鼓鳴角
列於鹵簿中所以示觀德之盛宜詔有司更製兼籍
鼓吹樂工以時閱習遇熙事出而用之有司請下軍
器所造節鼓一奏嚴鼓一百二十鳴角亦如之金鉦
二十有四太常前後部振作通用一千八百五十七
人而鼓吹益盛

按文獻通考云紹興十三年太常寺言將來郊祀

大禮排設大駕鹵簿儀仗并六引共用鼓吹八百
八十四人內鼓吹令丞二人昨在京本寺自有令
丞如闕以次充攝目今並闕人又府史典史各四
人舊係本寺人吏充攝緣人吏將來並充贊者等
已上並乞差殿司指揮使以上充又指揮使二人
舊係殿司差撥又帥兵官四十六人舊係殿前馬
步二司差受宣人充今乞並令逐司依舊歌色四
十八人金鉦十七人撾鼓十七人大鼓一百一十

人小鼓六十人長鳴六十人中鳴六十人鐃鼓十
七人拱宸管三十六人羽葆鼓十二人威篥二十
九人桃皮威篥二十四人笳八十七人大橫吹七
十人小橫吹六十人簫八十七人笛二十九人節
鼓一名已上舊係差本寺鼓吹局樂工一百餘人
不足並於逐司貼差雜攢樂人充令鼓吹局樂工
節目並闕其前項合用人數並乞令逐司依名色
人數下諸軍及將下剡刷稍諳樂藝之人從之

孝宗隆興二年兵部言奉明詔大禮乘輿服御除玉輅平輦等外所用人數並從省約內鼓吹合用八百四十一人止用五百八十八人警場合用二百七十五人止用一百三十人

淳熙中大閱帝自祥曦殿戎服而出皇太子親王執政以下並從諸將皆介冑乘馬導駕軍器分衛前後奏隨軍鼓管大樂上尋易金甲乘馬升將臺殿帥舉黃旗諸軍呼拜奏發嚴中軍鳴角馬步簇隊連三鼓

至四鼓舉白旗中軍鼓聲旗應乃變方陣別高一鼓
馬步軍出陣別高一鼓各歸部隊五鼓舉黃旗變員
陣又鼓舉赤旗變銳陣青旗變直陣收鼓訖一金止
重鼓鳴角簇隊放教此其凡也

按禮志云孝宗幸候潮門外教場殿前司言相視
龍王堂北江岸以東茅灘一帶平地可作教場已
修築將壇將來三司馬步軍並合全裝披帶衣甲
執色器械至日先赴教場下營排辦俟駕登臺聽

金鼓起居畢依資次變陣教閱往回沿路各奏隨
軍鼓笛大樂皇帝登臺三衙起居畢權主管殿前
司王達奏三司人馬齊舉黃旗諸軍呼拜者三達
奏請從頭教中軍鳴角倒門角旗出營馬步軍簇
隊成收鼓訖連三鼓馬軍上馬步人撮起旗鎗四
鼓舉白旗中軍鼓聲旗應變方陣為備敵之形別
高一鼓步軍四向作禦敵之勢且戰且前馬軍出
陣作戰鬪之勢別高一鼓各分歸地分五鼓舉黃

旗變圓陣為自環內固之形如前節次訖三鼓舉
赤旗變銳陣諸軍相屬魚貫斜列前利後張為衝
敵之形亦依前節次訖王達奏人馬教訖取旨舉
青旗變放教直陣收鼓訖一金止重鼓三馬軍下
馬步人齟落旗槍皆應規矩帝大悅犒賞倍之士
卒歡呼謝恩如儀鳴角聲簇隊訖

詩樂虞廷言樂以詩為本孔門禮樂之教自興於詩
始記曰十有三年學樂誦詩詠歌以養其性情舞蹈

以養其血脉此古之成材所以為易也宋朝湖學之

興老師宿儒痛正音之寂寥嘗擇取二南小雅數十

篇寓之墳籥使學者朝夕詠歌自爾聲詩之學學者

稍知所尚張載嘗慨然思欲講明作之朝廷用之郊

廟矣朱熹述為詩篇彙於學禮將使後之學者考焉

小雅歌凡六篇二南國風歌凡六篇小雅詩譜鹿鳴

四牡皇皇者華魚麗南有嘉魚南山有臺皆用黃鐘

清宮俗呼為正宮調二南國風詩譜關雎葛覃卷耳鵲巢采

蔡采蘋皆用無射清商

俗呼為越調

朱熹曰大戴禮言雅

二十六篇其八可歌其八廢不可歌本文頗有闕誤
漢末杜夔傳舊雅樂四曲一曰鹿鳴二曰騶虞三曰
伐檀又加文王詩皆古聲辭其後新辭作而舊曲遂
廢唐開元鄉飲酒禮乃有此十二篇之目而其聲亦
莫得聞此譜相傳即開元遺聲也古聲亡滅已久不
知當時工師何所考而為此竊疑古樂有唱有嘆唱
者發歌句也嘆者繼其聲也詩詞之外應更有疊字

散聲以歎發其趣故漢晉間舊曲既失其傳則其詞雖存而世莫能補如此譜直以一聲協一字則古詩篇篇可歌又其以清聲為調似亦非古法然古聲既不可考姑存此以見聲歌之彷彿俟知樂者考焉

琴律宋始製二絃之琴以象天地謂之兩儀琴每絃各六柱又為十二絃以象十二律其倍應之聲靡不畢備太宗因大樂雅琴加為九絃按曲轉入大樂十二律清濁互相合應大晟樂府嘗罷一三七九唯存

五絃謂其得五音之正最優於諸琴也今復俱用太常琴制其長三尺六寸三百六十分象周天之度也按陳氏樂書云太宗因太樂雅琴更加二絃召錢堯卿按譜以君臣文武禮樂正民心九絃按曲轉入大樂十二律清濁互相合應御製韶樂集中有正聲翻譯字譜又命鈞容班部頭任守澄并教坊正部頭花日新何元善等註入唐來燕樂半字譜凡一聲先以九絃琴譜對大樂字并唐來半字譜

並有清聲今九絃譜內有大定樂日重輪月重明

三曲并御製大樂乾安曲

仲呂大定樂一百三十
字南呂角日重輪一百

四十一字月重明一百一十一
字無射宮乾安曲四十八字

景祐韶樂集中太

平樂一曲譜法互同他皆倣此

又案文獻通考云太宗因前代七絃加二絃曰清
角清徵為九絃一絃黃鐘二絃大呂三絃太簇四
絃夾鐘五絃姑洗六絃仲呂七絃蕤賓八絃林鐘
按上為夷則九絃南呂按上為無射應鐘令隨編

鐘按習每一擊一彈各依節奏焉

姜夔樂議分琴為三準自一暉至四暉謂之上準上準四寸半以象黃鐘之半律自四暉至七暉謂之中準中準九寸以象黃鐘之正律自七暉至龍齧謂之下準下準一尺八寸以象黃鐘之倍律三準各具十二律聲按絃附木而取然須轉絃合本律所用之字若不轉絃則誤觸散聲落別律矣每一絃各具三十六聲皆自然也分五七九絃琴各述轉絃合調圖五

絃琴圖說曰琴為古樂所用者皆宮商角徵羽正音
故以五絃散聲配之其二變之聲惟用古清商謂之
側弄不入雅樂七絃琴圖說曰七絃散而扣之則間
一絃於第十暉取應聲假如宮調五絃十暉應七絃
散聲四絃十暉應六絃散聲二絃十暉應四絃散聲
大絃十暉應三絃散聲惟三絃獨退一暉於十一暉
應五絃散聲古今無知之者竊謂黃鐘大呂並用慢
角調故於大絃十一暉應三絃散聲太簇夾鐘並用

清商調故於二絃十二暉應四絃散聲姑洗仲呂蕤賓並用宮調故於三絃十一暉應五絃散聲林鐘夷則並用慢宮調故於四絃十一暉應六絃散聲南呂無射應鐘並用蕤賓調故於五絃十一暉應七絃散聲以律長短配絃大小各有其序九絃琴圖說曰絃有七有九實即五絃七絃倍其二九絃倍其四所用者五音亦不以二變為散聲也或欲以七絃配五音二變以餘兩絃為倍若七絃分配七音則是今之十

四絃也聲律訣云琴瑟齟四者律法上下相生也若加二變則於律法不諧矣或曰如此則琴無二變之聲乎曰附木取之二變之聲固在也合五七九絃琴總述取應聲法分十二律十二均每聲取絃暉之應皆以次列按古者大琴則有大瑟中琴則有中瑟有雅琴頌琴則雅瑟頌瑟實為之合夔乃定瑟之制桐為背梓為腹長九尺九寸首尾各九寸隱間八尺一寸廣尺有八寸岳崇寸有八分中施九梁皆象黃鐘

之數梁下相連使其聲冲融首尾之下為兩穴使其聲條達是傳所謂大瑟達越也四隅刻雲以緣其武象其出於雲和漆其壁與首尾腹取椅桐梓漆之全設二十五絃絃一柱崇二寸七分別以五色五五相次蒼為上朱次之黃次之素與黥又次之使肄習者便於擇絃絃八十一絲而朱之是謂朱絃其尺則用漢尺凡瑟絃具五聲五聲為均凡五均其二變之聲則柱後抑角羽而取之五均凡三十五聲十二律六

十均四百二十聲瑟之能事畢矣變於琴瑟之議其詳如此

朱熹嘗與學者共講琴法其定律之法十二律並用太史公九分寸法為準損益相生分十二律及五聲位置各定按古人以吹管聲傳於琴上如吹管起黃鐘則以琴之黃鍾聲合之聲合無差然後以次編合諸聲則五聲皆正唐人紀琴先以管色合字定宮絃乃以宮絃下生徵徵上生商上下相生終於少商下

生者隔二絃上生者隔一絃取之凡絲聲皆當如此
今人苟簡不復以管定聲其高下出於臨時非古法
也調絃之法散聲隔四而得二聲中暉亦如之而得
四聲八暉隔三而得六聲九暉按上者隔二而得四
聲按下者隔一而得五聲十暉按上者隔一而得五
聲按下者隔一而得四聲每疑七絃隔一調之六絃
皆應於第十暉而第三絃獨於第十一暉調之乃應
及思而得之七絃散聲為五聲之正而大絃十二律

之位又衆絃散聲之所取正也故逐絃之五聲皆自東而西相為次第其六絃會於十暉則一與三者角與散角應也二與四者徵與散徵應也四與六者宮與散少宮應也五與七者商與散少商應也其第三第五絃會於十一暉則羽與散羽應也義各有當初不相須故不同會於一暉也旋宮諸調之法旋宮古有隨月用律之說今乃謂不必轉軫促絃但依旋宮之法而抑按之恐難如此泛論當每宮指定各以何

聲取何絃為唱各以何絃取何律為均乃見詳實又以禮運正義推之則每律各為一宮每宮各有五調而其每調用律取聲亦各有法此為琴之綱領而說者罕及乃闕典也當為一圖以宮統調以調統聲令其次第賓主各有條理仍先作三圖一各具琴之形體暉絃尺寸散聲之位二附按聲聲律之位三附泛聲聲律之位列於宮調圖前則覽者曉然可為萬世法矣觀熹之言則於琴法本融未粲至疏達而至縝

密蓋所謂識其大者歟

燕樂宋初置教坊得江南樂已汰其坐部不用自後
因舊曲創新聲轉加流麗政和間詔以大晟雅樂施
於燕饗御殿按試補徵角二調播之教坊頒之天下
然當時樂府奏言樂之諸宮調多不正皆俚俗所傳
及命劉曷輯燕樂新書亦惟以八十四調為宗非復
雅音而曲燕昵狎至有援君臣相說之樂以藉口者
末俗漸靡之弊愈不容言矣紹興中始蠲省教坊樂

凡燕禮屏坐伎乾道繼志述事間用雜攢以充教坊之號取其臨時而廷紳祝頌務在嚴恭亦以明更不用女樂頒示子孫守之以為家法於是中興燕樂比前代尤簡而有關於君德者良多蔡元定嘗為燕樂一書證俗失以存古義今采其畧附于下黃鍾用合字大呂太簇用四字夾鍾姑洗用一字夷則南呂用工字無射應鍾用凡字各以上下分為清濁其中呂蕤賓林鍾不可以上下分中呂用上字蕤賓用勾字

林鍾用尺字其黃鍾清用六字大呂太簇夾鍾清各
用五字而以下上緊別之緊五者夾鍾清聲俗樂以
為宮此其取律寸律數用字紀聲之畧也一宮二商
三角四變為宮五徵六羽七閏為角五聲之號與雅
樂同惟變徵以於十二律中陰陽易位故謂之變變
宮以七聲所不及取閏餘之義故謂之閏四變居宮
商之對故為宮俗樂以閏為正聲以閏加變故閏為
角而實非正角此其七聲高下之畧也聲由陽來陽

生於子終於午燕樂以夾鍾收四聲曰宮曰商曰羽
曰閏閏為角其正角聲變聲徵聲皆不收而獨用夾
鍾為律本此其夾鍾收四聲之畧也宮聲七調曰正
宮曰高宮曰中呂宮曰道宮曰南呂宮曰仙呂宮曰
黃鍾宮皆生於黃鍾商聲七調曰大食調曰高大食
調曰雙調曰小食調曰歇指調曰商調曰越調皆生
於太簇羽聲七調曰般涉調曰高般涉調曰中呂調
曰正平調曰南呂調曰仙呂調曰黃鍾調皆生於南

呂角聲七調曰大食角曰高大食角曰雙角曰小食
角曰歇指角曰商角曰越角皆生於應鍾此其四聲
二十八調之畧也竊考元定言燕樂大要其律本出
夾鍾以十二律兼四清為十六聲而夾鍾為最清此
所謂靡靡之聲也觀其律本則其樂可知變宮變徵
既非正聲而以變徵為宮以變宮為角反紊亂正聲
若此夾鍾宮謂之中呂宮林鍾宮謂之南呂宮者燕
樂聲高實以夾鍾為黃鍾也所收二十八調本萬寶

常所謂非治世之音俗又於七角調各加一聲流蕩
忘反而祖調亦不復存矣聲之感人如風偃草宜風
俗之日衰也紹興乾道教坊迄弛不復置云

教坊自唐武德以來置署在禁門內開元後其人寢
多凡祭祀大朝會則用太常雅樂歲時宴饗則用教
坊諸部樂前代有宴樂清樂散樂本隸太常後稍歸
教坊有立坐二部宋初循舊制置教坊凡四部其後
平荆南得樂工三十二人平西川得一百三十九人

平江南得十六人平太原得十九人餘藩臣所貢者
八十三人又太宗藩邸有七十一人由是四方執藝
之精者皆在籍中每春秋聖節三大宴其第一皇帝
升坐宰相進酒庭中吹觱篥以衆樂和之賜羣臣酒
皆就坐宰相飲作傾盃樂百官飲作三臺第二皇帝
再舉酒羣臣立於席後樂以歌起第三皇帝舉酒如
第二之制以次進食第四百戲皆作第五皇帝舉酒
如第二之制第六樂工致辭繼以詩一章謂之口號

皆述德美及中外蹈詠之情初致辭羣臣皆起聽辭畢再拜第七合奏大曲第八皇帝舉酒殿上獨彈琵琶第九小兒隊舞亦致辭以述德美第十雜劇罷皇帝起更衣第十一皇帝再坐舉酒殿上獨吹笙第十二蹴鞠第十三皇帝舉酒殿上獨彈箏第十四女弟子隊舞亦致辭如小兒隊第十五雜劇第十六皇帝舉酒如第二之制第十七奏鼓吹曲或用法曲或用龜茲第十八皇帝舉酒如第二之制食罷第十九用

角觥宴畢其御樓賜酺同大宴宗德殿宴契丹使惟
無後場雜劇及女弟子舞隊每上元觀燈樓前設露
臺臺上奏教坊樂舞小兒隊臺南設燈山燈山前陳
百戲山棚上用散樂女弟子舞餘曲宴會賞花習射
觀稼凡游幸但奏樂行酒惟慶節上壽及將相入辭
賜酒則止奏樂

按陳氏樂書云宋朝循用唐制分教坊為四部收
荆南得工三十二人破蜀得工一百三十九人平

江南得二十六人始廢坐部定河東得工十九人
藩臣所獻八十三人及太宗在藩邸有七十餘員
皆籍而內之由是精工能手大集矣其器有琵琶
五絃箏箜篌笙簫簫簫篳篥笛方響杖鼓羯鼓大鼓拍
板并歌十四種焉自合四部以為一故樂工不能
徧習第以大曲四十為限以應奉游幸二燕非如
唐分部奏曲也唐全盛時内外教坊近及二千員
梨園三百員宜春雲韶諸院及掖庭之伎不闕其

數太常樂工動萬餘戶聖朝教坊裁二百員并雲韶鈞容東西班不及千人有以見祖宗勤勞庶政罔淫于樂之深意也然均調尚間以燕樂胡部之聲音器尚襲法曲龜茲之陋非先王制雅頌之音也革而正之豈非今日急務耶

所奏凡十八調四十大曲一曰正宮調其曲三曰梁州瀛府齊天樂二曰中呂宮其曲二曰萬年歡劔器三曰道調宮其曲三曰梁州薄媚大聖樂四曰南呂

宮其曲二曰瀛府薄媚五曰仙呂宮其曲三曰梁州
保金枝延壽樂六曰黃鍾宮其曲三曰梁州中和樂
劒器七曰越調其曲二曰伊州石州八曰大石調其
曲二曰清平樂大明樂九曰雙調其曲三曰降聖樂
新水調採蓮十曰小石調其曲二曰胡渭州嘉慶樂
十一曰歇指調其曲三曰伊州君臣相遇樂慶雲樂
十二曰林鍾商其曲三曰賀皇恩泛清波胡渭州十
三曰中呂調其曲二曰綠腰道人歡十四曰南呂調

其曲二曰綠腰罷金鉦十五曰仙呂調其曲二曰綠
腰綵雲歸十六曰黃鍾羽其曲一曰千春樂十七曰
般涉調其曲二曰長壽仙滿宮春十八曰正平調無
大曲小曲無定數不用者有十調一曰高宮二曰高
大石三曰高般涉四曰越角五曰商角六曰高大石
角七曰雙角八曰小石角九曰歇指角十曰林鍾角
樂用琵琶篳篥五絃琴箏笙箏簫笛方響羯鼓杖鼓
拍板法曲部其曲二一曰道調宮望瀛二曰小石調

獻仙音樂用琵琶笙篴五絃琴箏笙感策方響拍板
龜茲部其曲二皆雙調一曰宇宙清二曰感皇恩樂
用感策笛羯鼓腰鼓拊鼓鷄婁鼓鼗鼓拍板鼓笛部
樂用三色笛杖鼓拍板

隊舞之制其名各十小兒隊凡七十二人一曰柘枝
隊衣五色繡羅寬袍戴胡帽繫銀帶二曰劍器隊衣
五色繡羅襦裹交脚幘頭紅羅繡抹額帶器仗三曰
婆羅門隊紫羅僧衣緋掛子執錫環拄杖四曰醉胡

騰隊衣紅綿襦繫銀鞞鞬戴氍帽五曰譚臣萬歲樂
隊衣紫緋綠羅寬衫譚裏簇花幘頭六曰兒童感聖
樂隊衣青羅生色衫繫勒帛總兩角七曰玉兔渾脫
隊衣四色繡羅襦繫銀帶冠玉兔冠八曰異域朝天
隊衣錦襖繫銀束帶冠夷冠執寶盤九曰兒童解紅
隊衣紫緋繡襦繫銀帶冠花砌鳳冠綬帶十曰射雕
回鶻隊衣盤雕錦襦繫銀鞞鞬射雕盤女弟子隊凡
一百五十三人一曰菩薩蠻隊衣緋生色窄砌衣冠

卷雲冠二曰感化樂隊衣青羅生色通衣背梳髻繫
綬帶三曰拋毬樂隊衣四色繡羅寬衫繫銀帶奉繡
毬四曰佳人翦牡丹隊衣紅生色砌衣帶金冠翦牡
丹花五曰拂霓裳隊衣紅僊砌衣碧霞帔戴仙冠紅
繡抹額六曰採蓮隊衣紅羅生色綽子繫暈裙戴雲
鬟髻乘綵船執蓮花七曰鳳迎樂隊衣紅仙砌衣戴
雲鬟鳳髻八曰菩薩獻香花隊衣生色窄砌衣戴寶
冠執香花盤九曰綵雲仙隊衣黃生色道衣紫霞帔

冠仙冠執旌節鶴扇十曰打球樂隊衣四色窄繡羅
襦繫銀帶裏順風脚簇花幘頭執毬杖大抵若此而
復從宜變易

按陳氏樂書云宋朝禁坊所傳不過小兒女樂二
種而已女妓舞六十四人引舞二人執花四十人
卅童四人從伎四十人作語一人凡總一百五十
三舞名有十焉大宴酺會禁坊進二種舞每舞各
進一色舞疊方半則工伎止立間以俳優戲畢嘗

于崇德殿宴契丹人使但作小兒舞一種而已其
他端門望夜錫慶院賜羣臣及酺宴則舞工三十
六人凡此本唐宮中嬉燕之樂伶簫相傳故附曲
作舞而已雖冠服小異而工員常定非如坐立二
部出于當時之君有因而作也至于優伶常舞大
曲惟一工獨進但以手袖為容跼足為節其妙串
者雖風旋鳥騫不踰其速矣然大曲前緩疊不舞
至入破則羯鼓震鼓大鼓與絲竹合作句拍益急

舞者入場投節制容故有催拍歇拍之異姿制俯仰百態橫出然終于倡優詭玩而已故賤工專習焉鄭衛之樂也雖放之可也

建隆中教坊都知李德昇作長春樂曲乾德元年又作萬歲昇平樂曲明年教坊高班都知郭延美又作紫雲長壽樂鼓吹曲以奏御焉

太宗洞曉音律前後親制大小曲及因舊曲創新聲者總三百九十凡制大曲十八正宮平戎破陣樂南

呂宮平晉普天樂中呂宮大宋朝歡樂黃鍾宮宇宙
荷皇恩道調宮垂衣定八方仙呂宮甘露降龍庭小
石調金枝玉葉春林鍾商大惠帝恩寬歇指調大定
寰中樂雙調惠化樂堯風越調萬國朝天樂大石調
嘉禾生九穗南呂宮調文興禮樂歡僊呂調齊天長
壽樂般涉調君臣宴會樂中呂調一斛夜明珠黃鍾
羽降聖萬年春平調金觴祝壽春曲破二十九正宮
宴釣臺南呂宮七盤樂仙呂宮王母桃高宮靜三邊

黃鍾宮採蓮回中呂宮杏園春獻玉杯道調宮折枝
花林鍾商宴朝簪歇指調九穗禾高大石調轉春鶯
小石調舞霓裳越調九霞觴雙調朝八蠻大石調清
夜遊林鍾角慶雲見越角露如珠小石角龍池柳高
角陽臺雲歇指角金步搖大石角念邊功雙角宴新
春南呂調鳳城春仙呂調夢釣天中呂調採明珠平
調萬年枝黃鍾羽賀回鑾般涉調鬱金香高般涉調
會天仙琵琶獨彈曲破十五鳳鸞商慶成功應鍾調

九曲清金石角鳳來儀芙蓉調藥宮春蕤賓調連理
枝正仙呂調朝天樂蘭陵角奉宸歡孤鴈調賀昌時
大石調寰海清玉仙商玉芙蓉林鍾角泛仙槎無射
宮調帝臺春龍仙羽宴蓬萊聖德商美時清仙呂調
壽星見小曲二百七十正宮十一陽生玉牕寒念邊
戍玉如意瓊樹枝鷓鴣裘塞鴻飛漏丁丁息鞀鼓勸
流霞南呂宮十一仙盤露冰盤果芙蓉園林下風風
雨調開月幌鳳來賓落梁塵望陽臺慶年豐青駿馬

中呂宮十三上林春春波綠百樹花壽無疆萬年春
擊珊瑚柳垂絲醉紅樓折紅杏一園花花下醉游春
歸千樹柳仙呂宮九折紅蕖鵲渡河紫蘭香喜見時
猗蘭殿步瑤階千秋樂百和香佩珊珊黃鍾宮十二
菊花杯翠幕新四塞清滿簾霜畫屏風折茱萸望春
雲苑中鶴賜征袍望回戈稻稼成泛金英高宮九嘉
順成安邊塞獵騎還游兔園錦步帳博山鑪煖寒杯
雲紛紜待春來道調宮九會夔龍泛仙杯披風襟孔

雀扇百尺樓金罇滿奏明庭拾落花聲聲好越調八
翡翠帷玉照臺香旖旎紅樓夜朱頂鶴得賢臣蘭堂
燭金鐫流雙調十六宴瓊林汎龍舟汀洲綠登高樓
麥隴雉柳如烟楊花飛王澤新玳瑁簪玉階曉喜清
和人歡樂征戍回一院香一片雲千萬年小石調七
滿庭香七寶冠玉唾盃孟辟塵犀喜新晴慶雲飛太平
時林鍾商十採秋蘭紫絲囊留征騎塞鴻度回鶻朝
汀洲鴈風入松蓼花紅曳珠佩遵渚鴻歇指調九榆

塞清聽秋風紫玉簫碧池魚鶴盤旋湛恩新聽秋蟬
月中歸千家月高大石調九花下宴甘雨足畫秋千
夾竹桃攀露挑燕初來踏青回拋繡毬潑火雨大石
調八賀元正待花開採紅蓮出谷鶯游月宮望回車
塞雲平秉燭游小石調九月宮春折仙枝春日遲綺
筵春登春臺紫桃花一林紅喜春雨泛春池雙角九
鳳樓燈九門開落梅香春冰折萬年安催花發降真
香迎新春望蓬島高角九日南至帝道昌文風盛琥

珀杯雪花飛
皐貂裘征馬嘶
射飛鴈雪飄飄
大石角
九紅鑪火翠雲裘
慶成功冬夜長
金鸚鵡玉樓寒
鳳戲雛
一鑪香雲中鴈歇
指角九玉壺冰卷珠箔
隨風簾樹青
葱紫桂叢五色雲
玉樓宴蘭堂宴千秋
歲越角九望明堂
華池露貯香囊
秋氣清照秋池曉
風度靖邊城
聞新鴈吟風蟬林鍾
角九慶時康上林
果畫簾垂水精簾
夏木繁暑氣清
風中琴轉輕車清
風來仙呂調十五
喜清和芰荷新清
世歡玉鉤攔金步
搖

金錯落燕引雛草芊芊步玉砌整華裾海山青旋絮
綿風中帆青絲騎喜聞聲南呂調九春景麗牡丹開
展芳茵紅挑露轉林鶯滿林花風飛花中呂調九宴
嘉賓會羣仙集百祥凭朱欄香烟細仙洞開上馬杯
拂長袂羽觴飛高般涉調九喜秋成戲馬臺汎秋菊
芝殿樂鸚鵡杯玉芙蓉偃干戈聽秋砧秋雲飛般涉
調十玉樹花望星斗金錢花玉牕深萬民康瑤林風
隨陽鴈倒金壘鴈來賓看秋月黃鍾羽七宴鄒枚雲

中樹燎金鑪澗底松嶺頭梅玉鑪香瑞雪飛平調十
萬國朝獻春盤魚上冰紅梅花洞中春春雪飛翻羅
袖落梅花夜游樂闌春雞因舊曲造新聲者五十八
正宮南呂宮道調宮越調南呂調並傾杯樂三臺仙
呂宮高宮小石調大石調高大石調小石角雙角高
角大石角歇指角林鍾角高般涉調黃鍾羽平調並
傾杯樂中呂傾杯樂劍器感皇化三臺黃鍾宮傾杯
樂朝中措三臺雙調傾杯樂攤破拋毬樂醉花間小

重山三臺林鍾商傾杯樂洞中仙望行宮三臺歌指
調傾杯樂洞仙歌三臺仙呂調傾杯樂月宮仙戴仙
花三臺中呂調傾杯樂菩薩蠻瑞鷓鴣三臺般涉調
傾杯樂望征人嘉宴樂引駕回拜新月三臺若宇宙
賀皇恩降聖萬年春之類皆藩邸所作以述太祖美
德諸曲多祕而平晉普天樂者平河東回所製萬國
朝天樂者又明年所製每宴享常用之然帝勤求治
道未嘗自逸故舉樂有度雍熙初教坊使郭守忠求

外任止賜束帛

太宗所製曲乾興以來通用之凡新奏十七調總四十八曲黃鍾道調仙呂中呂南呂正宮小石歇指高平般涉大石中呂仙呂雙越調黃鍾羽其急慢諸曲幾千數又法曲龜茲鼓笛三部凡二十有四曲

仁宗洞曉音律每禁中度曲以賜教坊或命教坊使撰進凡五十四曲朝廷多用之天聖中帝嘗問輔臣以古今樂之異同王曾對曰古樂祀天地宗廟社稷

山川鬼神而聽者莫不和悅今樂則不然徒娛人耳目而蕩人心志自昔人君流連荒亡者莫不繇此帝曰朕于聲技固未嘗留意内外宴游皆勉強耳張知白曰陛下盛德外人豈知之願備書時政記

世號太常為雅樂而未嘗施於宴享豈以正聲為不美聽哉夫樂者樂也其道雖微妙難知至于奏之而使人悅豫和平則不待知音而後能也今太常樂縣鍾磬塤箎搏拊之器與夫舞綴羽籥干戚之制類皆

倣古逮振作之則聽者不知為樂而觀者厭焉古樂
豈真若此哉孔子曰惡鄭聲恐其亂雅亂之云者似
是而非也孟子亦曰今樂猶古樂而太常乃與教坊
殊絕何哉昔李照胡瑗阮逸改鑄鍾磬處士徐復笑
之曰聖人寓器以聲不先求其聲而更其器其可用
乎照瑗逸制作久之卒無所成蜀人房庶亦深訂其
非是因著書論古樂與今樂本末不遠其大略以謂
上古世質器與聲朴後世稍變焉金石鍾磬也後世

易之為方響絲竹琴簫也後世變之為箏笛匏笙也
攢之以斗塤土也變而為甌草麻料也擊而為鼓木
祝敔也貫之為板此八音者於世甚便而不達者指
廟樂鐃鍾鐃磬宮軒為正聲而概謂夷部鹵部為淫
聲殊不知大輅起於推輪龍艘生於落葉其變則然
也古者食以俎豆後世易以杯盂簞席以為安後世
更以榻按聖人復生不能舍杯盂榻按而復俎豆簞
席之質也八音之器豈異此哉孔子曰鄭聲淫者豈

以其器不若古哉亦疾其聲之變耳試使知樂者由
今之器寄古之聲去憊懣靡曼而歸之中和雅正則
感人心導和氣不曰治世之音乎然則世所謂雅樂
者未必如古而教坊所奏豈盡為淫聲哉當數子紛
紛銳意改制之後庶之論指意獨如此故存其語以
俟知者教坊本隸宣徽院有使副使判官都色長色
長高班大小都知天聖五年以內侍二人為鈐轄嘉
祐中紹樂工每色額止二人教頭止三人有闕即填

異時或傳詔增置許有司論奏使副歲閱雜劇把色人分三等遇三殿應奉人闕即以次補諸部應奉及二十年年五十以上許補廟令或鎮將官制行以隸太常寺同天節寶慈慶壽宮生辰皇子公主生凡國之慶事皆進歌樂詞

熙寧九年教坊副使花日新言樂聲高歌者難繼方響部器不中度絲竹從之宜去噍殺之急歸嗶緩之易請下一律改造方響以為樂準絲竹悉從其聲則

音律皆協以導中和之氣詔從之十一月奏新樂於化成殿帝諭近臣曰樂聲第降一律已得寬和之節矣增賜方響為架三十命太常下法駕鹵簿樂一律如教坊云

孝宗隆興二年天申節將用樂上壽上曰一歲之間只兩宮誕日外餘無所用不知作何名色大臣皆言臨時點集不必置教坊上曰善乾道後北使每歲兩至亦用樂但呼市人使之不置教坊止令修內司先

兩旬教習舊例用樂人三百人百戲軍百人百禽鳴
二人小兒隊七十一人女童隊百三十七人築毬軍
三十二人起立門行人三十二人旗鼓四十人

以上並臨

安府差

相撲等子二十一人

御前忠佐司差

命罷小兒及女童

隊餘用之

雲韶部者黃門樂也開寶中平嶺表擇廣州內臣之
聰警者得八十人令於教坊習樂藝賜名簫韶部雍
熙初改曰雲韶每上元觀燈上巳端午觀水嬉皆命

作樂於宮中遇南至元正清明春秋分社之節親王
內中宴射則亦用之奏大曲十三一曰中呂宮萬年
歡二曰黃鐘宮中和樂三曰南呂宮普天獻壽此曲
亦太宗所製四曰正宮梁州五曰林鐘商泛清波六
曰雙調大定樂七曰小石調喜新春八曰越調胡渭
州九曰大石調清平樂十曰般涉調長壽仙十一曰
高平調罷金鉦十二曰中呂調綠腰十三曰仙呂調
綵雲歸樂用琵琶箏笙箏篳篥笛方響杖鼓羯鼓大鼓

拍板雜劇用傀儡後不復補

鈞容直亦軍樂也太平興國三年詔籍軍中之善樂者命曰引龍直每巡省遊幸則騎導車駕而奏樂若御樓觀燈賜酺則載第一山車端拱二年又選捧日天武拱聖軍曉暢音律者增多其數以中使監視藩臣以樂工上貢者亦隸之淳化四年改名鈞容直取鈞天之義初用樂工同雲韶部大中祥符五年因鼓工溫用之請增龜茲部如教坊其奉天書及四宮觀

皆用之有指揮使一人都知二人副都知二人押班
三人應奉文字一人監領內侍二人嘉祐元年係籍
三百八十三人六年增置四百三十四人詔以為額
闕即補之七年詔隸班及二十四年年五十以上者
聽補軍職隸軍頭司其樂舊奏十六調凡三十六大
曲鼓笛二十一曲并他曲甚衆嘉祐二年監領內侍
言鈞容直與教坊樂並奏聲不諧詔罷鈞容舊十六
調取教坊十七調肄習之雖間有損益然其大曲曲

破并急慢諸曲與教坊頗同矣紹興中鈞容直舊管
四百人楊存中請復收補權以舊管之半為額尋聞
其召募騷擾降詔止之及其以應奉有勞進呈推賞
又申諭止於支賜一次庶杜其日後希望紹興三十
年復詔鈞容班可蠲省令殿司比擬一等班直收頗
內老弱癯疾者放停教坊所嘗援祖宗舊典點選入
教雖暫從其請紹興三十一年有詔教坊即日蠲罷
各令自便

東西班樂亦太平興國中選東西班習樂者樂器獨用銀字箏篋小笛小笙每騎從車駕而奏樂或巡方則夜奏於行宮殿庭

諸軍皆有善樂者每車駕親祀回則衣緋綠衣自青城至朱雀門列於御道之左右奏樂迎奉其聲相屬聞十數里或軍中宴設亦奏之

掉刀鎗牌翻歌等不常置

清衛軍習樂者令鈞容直教之內侍主其事園苑賜


會及館待契丹使人

又有親從親事樂及開封府衙前樂園苑又分用諸
軍樂諸州皆有衙前樂

四夷樂者元豐六年五月召見米脂砦所降戎樂四
十二人奏樂於崇政殿以三班借職王恩等六人差
監在京閒慢庫務門及舊城門敢勇三十六人與茶
酒新任殿侍大晟樂書曰前此宮架之外列熊羆案
所奏皆夷樂也宣容濟雜大樂乃奏罷之然古鞀鞀

氏掌四夷樂舞師旄人各有所掌以承祭祀以供宴
享蓋中天下而立得四海之歡心使鼓舞焉先王之
所不廢也漢津曰每大朝會宜設於殿門之外天子
御樓則宮架之外列於道側豈可施于廣庭與大樂
並奏哉

御製律呂正義後編卷八十九



總校官庶吉士臣張能照

校對官中書臣馮培

謄錄監生臣楊搢